

Westin su dianan ta conta!



ORANJESTAD -- Conoci tabata ta cu for di juli di aña pasa cu Westin lo a bay wordo compra pa e mesun grupo cu ta propietario di Riu Palace y awo e empleadonan, entrante dia 27 di februari, no tin trabao mas.

Les a detayenan riba pagina A2

Westin su dianan ta conta!

ORANJESTAD – Manera cu BON DIA ARUBA a premira, Riu a cumpra Westin, y awo e empleadonan entrante dia 27 di februari, no tin trabao mas. Tanto sindicatonan como pueblo en general, manera cu e noticia a sali den publicidad ta cu nan cabeynan a para, pasobra loke a wordo priminti prome cu eleccion no a wordo cumpli. E noticia aki ta coriendo ya for di den oranan di ayera mainta, creando un panico grandi cerca e empleadonan.

NO TIN MENASA

Conoci tabata ta cu for di juli di aña pasa cu Westin lo a bay wordo cumpra pa e mesun grupo cu ta propietario di Riu Palace, pero e deal no a bay sigui. En bista cu tabata den porta di eleccion, e fout di mas grandi cu Minister di Turismo, Sr. Otmar Oduber, a haci tabata di garantisa e empleadonan den un conferencia di prensa cu a tuma lugar dia 29 di augustus di e mesun aña, cu “na ningun momento no tin ningun menasa riba e trahadonan di Westin Hotel”, cual BON DIA ARUBA ta cita textualmente.

WEGA DI BENTA

Si nos mester capitula loke Oduber a trece dilanti, tabata den cuadro di un articulo cu BON DIA ARUBA a publica e dia anterior, caminda cu un wega a wordo hunga pa loke



ta trata e benta di dicho hotel.

A BULA DI.....

Westin Hotel a wordo bendi, varios biaha cu diferente grupo. Asina mes e mandatario a expresa e tempo ey di kier kita tur duda cu por a existi cerca e empleadonan, cu nan lo perde nan trabao. E palabranan aki tin cu bisa cu ta bons bek, pasobra awo tur tin cu bay cas.

KIBRAMENTO DI LEY

Oduber a splica cu entrante dia 1 di april di 2013, un ley nobo a pasa cu si un grupo of compania kier cumpra un propiedad e mester cumpr’e hunto cu su trahadonan. Antes esaki tabata posibel, pero parce cu e ley aki a wordo lubida y poni un banda y e trahadonan lo bay keda sin trabao.

A KEDA KETO

Segun fuentenan yega na gerencia, e noticia aki tabata hermeticamente cera, mirando cu tabata dianan di fiesta. Despues cu esaki a pasa, e noticia a wordo benta manera un bom riba empleadonan, kende a ricibi un pakete pa nan bay. Extraoficial cu BON DIA ARUBA a ricibi ta cu si nan no acepta e pakete, nan lo wordo retira y sin pago.

SINDICATO DI HOTEL

Ya for di un principio BON DIA ARUBA a busca manera pa tuma contacto cu presidente di e sindicato cu ta representa e hotel den cas, esta Sra. Katiuska Antersijn, pero aparentemente esaki lo a keda keto manera un raton y no a hisa un dede pa loke ta bienestar di e empleadonan. E noticia aki ya tabata conoci caba cerca e sindicato

aki, pero manera cu ta wordo mira, no a sali na defensa di e trahadonan manera cu nan ta supone di a haci. Sindicato STA a premira e situacion aki. Den un combersacion masha breve cu BON DIA ARUBA tabata tin cu presidente di e sindicato, Sr. Diego de Cuba, el a menciona cu esaki tabata bisto caba y ta preocupa awo pa e bienestar di e trahadonan, mirando cu dentro di un tiki mas cu un luna, ya nan ta sin trabao.

DESTINO DI E TRAHADONAN

Kico lo bay para awor di e trahadonan? Kendenan lo bay tuma nan den servicio pa e tempo cu e hotel ta bay den renobacion, manera cu ta wordo bisa supuestamente. Aparentemente e hotel lo bay ta den un renobacion total cu lo bay hiba un periodo di mas of menos 8 pa 9 luna. Otro cos mas cu a sali dilanti ta cu e grupo a laga sa, cu si e empleadonan kier keda traha, despues di e renobacion, nan tin cu aplica di nobo pa mira si nan ta haya nan trabao. Aki ta papiando di hendenan cu tin varios aña trahando na e hotel aki. Tin di nan ta coriendo entre 10 pa 20 aña.

TURISMO DI CALIDAD

Esaki sigur ta un turismo di calidad cu ta wordo fomenta den nos comunidad. Kitando pan di mama y tata di famia,

cu pa motibo di capricho di un grupo, no por mantene e trahadonan aki den nan posicion. Ta di spera cu Minister di Turismo y tambe Minister Presidente y gobierno den su totalidad, por intermedia y duna sosten na e empleadonan aki, mescos cu nan a sa di tene Tiara Air na liña pa asina e por a scapa di un posibel abismo financiero.

MAS PA BIN

Si gobierno tabata sa cu esaki lo a bay pasa, kico mas lo bay pasa awo. Ki garantia nan ta duna si e trahadonan no recupera nan trabao bek? Ainda falta e pio pa bin... Kico e empleadonan aki lo bay haci durante 8 of 9 luna cu e hotel ta den renobacion. Tin cu corda cu tur e hendenan aki tin auto pa paga, cas pa paga, nan gastonan mensual cu tin cu cumpli cun’e. Sin lubida alimento pa e proximo lunanan cu ta bay bin.

Y AINDA FALTA.....

Loke tambe ta keda un pregunta ta e huespednan cu ta kedando actualmente y esunnan cu a boek caba pa e temporada cu ta bin. Eseyan ta pregunta cu mester di un contesta. Sigur nos ta spera cu e mandatarionan por tin un contesta satisfactorio riba esaki, pasobra pueblo ta rabia cu “e bon trabao no a sigui manera nos a spera y ainda falta....” □